

**ZAKON
O JAVNOM REDU I MIRU
BRČKO DISTRIKTA BOSNE I HERCEGOVINE**

(Službeni glasnik Brčko Distrikta BiH broj 2/2002)

Na osnovu člana 23. Statuta Brčko Distrikta Bosne i Hercegovine, Skupština Brčko Distrikta Bosne i Hercegovine na 37. sjednici održanoj 28.januara 2002.godine, usvojila je

Z A K O N O JAVNOM REDU I MIRU

Član 1.

Ovim zakonom određuju se prekršaji kojima se narušava javni red i mir i prekršajne sankcije za počinioc prekršaja propisanih ovim zakonom u Brčko Distriktu Bosne i Hercegovine (u daljem tekstu Brčko Distriktu).

Određivanjem prekršaja kojima se narušava javni red i mir zakonom se štite normalan način života i rada građana, utvrđuju slučajevi narušavanja i ugrožavanja bezbjednosti, ličnosti i dostojanstva na javnim mjestima, narušavanja zakonitosti rada i funkcionisanja državnih organa, preduzeća i drugih pravnih lica i udruženja građana i pravilnog korštenja javnih objekata ili na drugi sličan način narušavanja javnog reda i mira.

Ovim zakonom uređuju se uslovi i postupak za priređivanje vatrometa i sličnih priredbi, na kojima se upotrebljavaju pirotehnička sredstva, kao i uslovi i postupak za prikupljanje dobrovoljnih priloga i svih vidova pomoći za izbjeglice i raseljena lica od građana, preduzeća, drugih pravnih lica i udruženja građana.

Član 2.

U smislu ovog zakona:

"Naročito drsko ponašanje" označava neovlaštenu upotrebu vatrenog oružja ili grubo vrijeđanje drugog lica ili drugo bezobzirno ponašanje kojim se ugrožava bezbjednost građana, ili kojim se može izazvati osjećanje fizičke ugroženosti, uznemirenost ili negodovanje građana.

"Javno mjesto" označava mjesto na koje je slobodan pristup pojedinačno svim licima bez uslova ili pod određenim uslovima.

"Ovlašteno lice" označava lice koje u organu ili instituciji Brčko Distrikta i unutar preduzeća ima zakonsko ovlaštenje da u skladu sa zakonom izvršava javna ovlaštenja i koje ove aktivnosti obavlja u sklopu ovih ovlaštenja.

"Odgovorno lice" je lice koje radi u preduzeću ili nekom drugom pravnom licu, kojem je povjereno da u skladu sa funkcijom ili na osnovu posebnog ovlaštenja u sklopu obima posla izvršava zakon ili reguliše sprovođenje propisa na osnovu zakona ili opšteg akta preduzeća ili nekog drugog pravnog lica u upravljanju i rukovođenju imovinom ili se odnosi na rukovođenja procesom proizvodnje ili drugih procesa, ili se odnose na nadzor nad ovim procesima.

"Zajedničke prostorije" znače vlasništvo ili kondominijum nad dijelom objekta koji može da uključuje pomoćne dijelove kao što su otvoreni balkoni, terase, podrumke prostorije, potkrovlja, stepeništa, hodnike, liftove, vrtove, mjesta za garažiranje do dva motorna vozila po jednom stanu i slično.

"Policijski čas" označava određeni vremenski period u kome se nadležne vlasti Brčko Distrikta zabranile pristup, zadržavanje, okupljanje ili kretanje građana na određenim mjestima ili području.

"Građanski mir" označava stanje javnog mira i slobode od javnog uznemiravanja i neprijateljstva.

Član 3.

Prekršaj javnog reda i mira čini:

1. ko na javnom mjestu narušava javni red i mir svađom, vikom, nepristojnim ili drugim drskim ponašanjem;
2. ko na javnom mjestu narušava javni red i mir učestvovanjem u tuči, zlostavljanjem ili fizičkim napadom na drugog;
3. ko na javnom mjestu narušava javni red i mir naročito drskim ponašanjem;
4. ko ugrožava bezbjednost ili izaziva osjećanje ugroženosti drugog lica prijetnjom da će napasti na njegov život ili tijelo;
5. ko ometa organe i institucije Brčko Distrikta, preduzeća i druga pravna lica koja vrše javna ovlaštenja ili njihova službena, odnosno odgovorna lica prilikom vršenja ili u vezi sa vršenjem službenih poslova i zadataka, ili ko ne postupi na licu mjesta po zakonitom zahtjevu njihovog službenog lica;
6. ko ne postupi po naredbi ili rješenju državnog organa kojim se reguliše policijski čas;
7. ko na javnom mjestu govori, pisanjem ili na drugi način vrijeđa ili omalovažava patriotska, nacionalna, vjerska ili moralna osjećanja građana;
8. ko iznosi ili prenosi lažne vijesti, glasine ili tvrđenja kojim sa može izazvati uznemirenje građana ili ugroziti javni red i mir;
9. ko neovlašteno ukloni, pocijepa ili na drugi način ošteti javno istaknute objave, odnosno oglase državnih organa ili vlasti Brčko Distrikta, preduzeća, udruženja građana, političkih partija, i drugih pravnih lica, ako su oni istaknuti u skladu sa propisima, odnosno spriječiti isticanje ili isticanje javne objave ili oglase suprotno propisima;
10. ko se lažno predstavlja kao zvaničnik ili predstavnik države, entiteta, ili vlasti Brčko Distrikta ili kao druga pravna lica koja imaju javna ovlaštenja, ili međunarodne organizacije;
11. ko pri prometu alkoholnih pića daje alkoholna pića očigledno pijanom licu, maloljetniku mlađem od 16 godina života, duševno bolesnom licu ili licu zaostalog duševnog razvoja;
12. ko prosjači, navodi na prosjačenje maloljetno lice, duševno bolesno ili lice zaostalog duševnog razvoja ili se odaje skitnji;

13. ko se kocka ili ustupa, odnosno iznajmljuje prostorije radi kockanja, osim u slučajevima kocke koja se odvija u za to namijenjenim prostorijama registrovanim za tu vrstu djelatnosti;
14. ko se odaje prostituciji ili ko iznajmi , odnosno ustupi prostorije radi vrešnja prostitucije;
15. ko neopravdano zalazi ili se nepravedno zadržava u zajedničkim prostorijama stambene zgrade u kojoj ne stanuje;
16. ko pali pirotehnička ili eksplozivna sredstva na mjestima i na način na kojima se izaziva uznemirenost građana;
17. ko pali pirotehnička sredstva ili izvodi druge slične priredbe bez najave u skladu sa propisima zakonom ili mimo zabrane vlasti Brčko Distrikta ili ako lice ne preduzme mjere obezbjeđenja koje je dužan preduzeti prema članu 5 ovog zakona;
18. ko prikuplja dobrovoljne priloge ili pomoć za raseljena lica, izbjeglice i lica kojima je ta pomoć neophodna protivno članu 6 ovog zakona;
19. ko vrši, organizuje i omogućava preprodaju ulaznica za sportske i druge priredbe;
20. ko se u vidu zanimanja bavi vraćanjem, proricanjem sudbine ili sličnim obmanjivanjem u cilju pribavljanja materijalne koristi;
21. ko remeti mir drugih izvođenjem muzičkih i drugih sadržaja, korištenjem muzičkih instrumenata, radio i televizijskih prijemnika i drugih zvučnih uređaja, kao i mehaničkim izvorima buke (motora i sl.) u vremenu od 15-18 sati i 22-06 sati;
22. ko stavi ili drži ispred zgrade ili ograde, odnosno na zgradi ili ogradi uređaj ili predmet koji može ugroziti prolaznika ili mu nanijeti štetu, ili ko takve predmete izbacila na ulicu;
23. ko bez nadzora ili zaštitnih sredstava drži opasne životinje koje drugog mogu prestrašiti ili povrijediti, ili ko na javnom mjestu zlostavlja životinje, ili na drugi način sa njima surovo postupa;
24. ko na javno mjestu omalovažava novac Bosne i Hercegovine na taj način što ga pocijepa, ili na drugi način uništi i ošteti;
25. ko na javnom mjestu uživa opojnu drogu ili psihotropne supstance koje mu nisu prepisane iz medicinskih razloga;
26. roditelj, usvojlac, odnosno staratelj maloljetnika koji je učinio prekršaj protiv javnog reda i mira propisan ovim zakonom, ako je izvršenje prekršaja posljedica njihovog propuštanja dužnog staranja o maloljetniku, a u mogućnosti su da takav nadzor vrše;
27. Ko u vršenju poslovne djelatnosti krši radno vrijeme određeno od nadležnog organa Brčko Distrikta.

Član 4.

Za prekršaj iz člana 3 tačka 1 i 2 učinilac će se kazniti i kad je prekršaj izvršen na drugim mjestima kad je usljed blizine ili izloženosti pogledu drugih izvršenom radnjom narušen javni red i mir.

Član 5.

Priredivanje vatrometa i drugih sličnih opasnih priredbi mora se prijaviti Policiji Brčko Distrikta najkasnije pet dana prije održavanja priredbi.

U prijavi, pored ostalog, mora se navesti mjesto, vrijeme i svrha održavanja priredbe, količinu pirotehničkih sredstava koje će se koristiti, kao i mjere obezbjeđenja koje će se preduzeti.

Priredivač je dužan da sprovodi mjere obezbjeđenja koje mu rješenjem odredi Policija Brčko Distrikta.

Policija Brčko Distrikta može zabraniti održavanje priredbe iz stava 1 ovog člana ako to zahtijevaju razlozi javne bezbjednosti.

U slučaju da Policija Brčko Distrikta zabrani izvođenje priredbe, policija je dužna da donese rješenje o zabrani i da ga dostavi priredivaču najkasnije 48 sati prije održavanja priredbe.

Žalba izjavljena protiv ovog rješenja iz stava 1 ovog člana ne odlaže njihovo izvršenje.

Član 6.

Preduzeća i druga pravna lica, humanitarne i druge organizacije, građani i udruženja građana, političke stranke mogu prikupljati dobrovoljne priloge i druge vidove pomoći građanima uz odobrenje Vlade Brčko Distrikta.

Zahtjev za izdavanje odobrenja za prikupljanje dobrovoljnih priloga podnosi se najkasnije osam dana od dana kada je planirano prikupljanje dobrovoljnih priloga.

U zahtjevu iz stava 2 ovog člana navodi se naziv podnosioca, mjesto, vrijeme, svrha i način prikupljanja, lični podaci lica koja će prikupljati priloge i mjere koje će se preduzeti radi obezbjeđenja od eventualnih zloupotreba u vezi sa prikupljanjem dobrovoljnih priloga.

Vlada Brčko Distrikta neće odobriti prikupljanje dobrovoljnih priloga ako takvo prikupljanje ugrožava spokojstvo građana ili remeti javni red i mir.

Vlada Brčko Distrikta dužna je donijeti rješenje po zahtjevu za izdavanje odobrenja u roku od tri dana od dana podnošenja zahtjeva.

Žalba na rješenje iz stava 5 ovog člana podnosi se u roku od tri dana od prijema rješenja, a drugostepeni organ odlučiće o žalbi u roku od tri dana od podnošenja žalbe.

Odobrenje iz stava 1 i 2 ovog člana nije potrebno za dobrovoljne priloge:

- koji se prikupljaju u okviru preduzeća ili drugog pravnog lica za zajedničke potrebe ili za potrebe pojedinih radnika;
- čije prikupljanje organizuje kućni savjet u zgradi kojom upravlja, za određenu potrebu u okviru djelatnosti kućnog savjeta;
- koji se prikupljaju umjesto ulaznica za priredbe koje organizuju političke stranke ili udruženja građana u skladu sa programom njihove aktivnosti.

Član 7.

Učinitelac će kazniti:

1. za prekršaje iz člana 3 tačka 2,4,5,6,7,8,9,11,14,25 i tačka 26 ovog zakona novčanom kaznom do 4.000 KM;
2. za prekršaj iz člana 3 tačka 1,3,10,12,13,19 i 23 ovog zakona novčanom zakonom do 2.500 KM;
3. za prekršaje iz člana 3 tačka 17,18,20 i 22 ovog zakona novčanom kaznom do 1.800 KM;
4. za prekršaje iz člana 3 tačka 15,16,21 i 24 ovog zakona novčanom kaznom do 500 KM;

Član 8.

Preduzeća ili druga pravna lica ili privatni poduzetnik kazniće se novčanom kaznom do 30.000 KM za prekršaj iz člana 3 tačka 13 i 14 i do 15.000 KM za bilo koji drugi prekršaj iz člana 3 ovog zakona.

Za prekršaje iz člana 3 tačka 13 i 14 kazniće se odgovorno lice u preduzeću ili u drugom pravnom licu novčanom kaznom do 5.000 KM, ili za bilo koji drugi prekršaj iz člana 3 ovog zakona novčanom kaznom do 3.000 KM.

Privatni ugostitelj ili lice kome je povjereno vođenje ugostiteljskog objekta kazniće se novčanom kaznom do 5.000 KM za prekršaj iz člana 3 ovog zakona.

Član 9.

Privatni ugostitelj ili lice koje se bavi ugostiteljskom djelatnošću (u daljem takstu: ugostiteljsko preduzeće), odgovorna lica u preduzećima, privatni ugostitelji ili lica kojima je povjerno vođenje javnog reda i mira u ovim prostorijama dužni su bez odlaganja prijaviti narušavanja javnog reda i mira nadležnom organu kad je to moguće bez opasnosti po sebe ili druge.

Ugostiteljsko preduzeće koje ne postupi u skladu sa odredbama prethodnog stava kazniće se za prekršaj novčanom kaznom do 10.000 KM.

Za prekršaj iz prethodnog stava kazniće se odgovorno lice u ugostiteljskom preduzeću do 3.000 KM.

Za prekršaj iz stava 1 ovog člana kazniće se privatni ugostitelj novčanom kaznom do 5.000 KM, a lice kojem je povjereno vođenje ugostiteljskog objekta novčanom kaznom do 3.000 KM.

Privatnom ugostitelju može se izreći i zaštitna mjera zabrane vršenja samostalne ugostiteljske djelatnosti, a licu kojem je povjeren vođenje ugostiteljske radnje zaštitna mjera zabrane bavljenja ugostiteljskim zanimanjima u radnji u kojoj je učinjen prekršaj.

Zaštitne mjere iz prethodnog stava mogu se izreći u trajanju od tri mjeseca do godinu dana.

Član 10.

Za prekršaje iz člana 3 ovog zakona može se izreći i zaštitna mjera oduzimanja predmeta koji su upotrebljeni ili su namijenjeni za izvršenje prekršaja, ili koji su nastali izvršenjem prekršaja.

Za prekršaje iz člana 3 ovog zakona može se izreći zaštitna mjera udaljenja stranca sa teritorije Brčko Distrikta u skladu sa Zakonom o prekršajima Brčko Distrikta u trajanju od šest mjeseci do tri godine.

Član 11.

Radnici policije, kad u vršenju službenih poslova i zadataka saznaju za prekršaj propisan ovim zakonom, mogu privremeno oduzeti predmete koji su upotrebljeni ili su namijenjeni za izvršenje prekršaja, kao i predmete koji mogu poslužiti kao dokaz u prekršajnom postupku.

Član 12.

Danom stupanja na snagu ovog zakona prestaje da važi Zakon o javnom redu i miru ("Službeni glasnik SRBiH", br.42/90) i Zakon o javnom redu i miru Republike Srpske ("Službeni glasnik Republike Srpske", broj:10/98) na teritoriji Brčko Distrikta Bosne i Hercegovine.

Član 13.

Ovaj zakon stupa na snagu osmog dana od dana objavljivanja u "Službenom glasniku Brčko Distrikta Bosne i Hercegovine".

BROJ:0-02-022-2/02
Brčko,28.januara 2002.godine

PREDSJEDNIK
SKUPŠTINE BRČKO DISTRIKTA
Mirsad Đapo,s.r.